

提菩須羅睺羅

佛
學
故
事
叢
書

局書學佛海上



佛敎故事叢書

佛大弟子

羅睺羅
須菩提

事蹟

羅睺羅事蹟

(一) 誕生因緣

(二) 出家緣記

(三) 受戒得道

須菩提事蹟

(一) 誕生及出家

(二) 宿世因緣

佛教故事 佛大弟子羅睺羅事蹟

(一) 誕生因緣 出大智度論第十七品

悉達太子有二夫人；一名劬毗耶，二名耶輸陀羅。

毗耶是寶女，故不曾懷孕。耶輸陀羅以菩薩出家夜，自覺有娠；菩薩六年苦行，耶輸陀羅六年不產。諸釋詰之：『菩薩出家，何由有此？』耶輸陀羅言：『我無他罪，我所懷子，實是太子遺體。』諸釋言：『何以久而不產？』答

曰：「非我所知。」諸釋集議聞王，欲如法治罪。劬毗耶啓王：「我常與耶輸陀羅共住，我爲其證知其無罪；待其子生，看似父不？治之何晚。」王卽寬置。

菩薩苦行既滿，初成佛夜，生羅睺羅。王見其似父，愛念忘憂，語羣臣言：「我兒雖去，今得其子，與兒無異。」

耶輸陀羅惡聲已著，欲除惡名；佛還迦毗羅，度諸釋子，時淨飯王及耶輸陀羅，常請佛入宮食。是時耶輸陀羅

持一百味歡喜丸，與羅睺羅捧持上。佛以神力，變五百阿羅漢，皆如佛形，等無有異。羅睺羅年始七歲，持歡喜丸，直至佛前，奉進世尊。是時佛攝神力，復比丘形，鉢內皆空，唯佛鉢滿歡喜丸。耶輸陀羅問曰：『我昔何緣懷妊六歲？』佛答：『羅睺羅過去時，曾作國王，時有一五通仙人，來入王國，語王言：『王以法治賊，請治我罪；我輒偷王水，用王楊枝，爲不與取。』王言：『我初登位有令：皆以水及楊枝，施於一切。』仙人言：『王雖已施，

我心故惑；願今見治，無令後罪。」王曰：「若必欲爾，小停待我入宮。」入宮六日方出，仙人飢渴，仙人曰：「恐王正以此治我。」王出辭謝忘去。因是五百世中，常六年在胎。」

(二) 出家緣記 出未曾有經

爾時世尊告目犍連：「汝今往彼迦毘羅城，問訊我父閱頭檀王，并我姨母波闍波提，及三叔父斛飯王等；因復慰喻羅睺羅母耶輸陀羅，令割恩愛，放羅睺羅，令作沙彌。」

，修習聖道。所以者何？母子恩愛，歡樂須臾，死墮地獄，母之與子，各不相知，窈窈冥冥，永相離別，受苦萬端，後悔無及；羅睺得道，當還度母，永絕生老病死根本，得至羅漢，如我今也。」

目連受命，屈伸臂頃，到迦毘羅淨飯王所，而白王言：「世尊慇懃，致問無量，起居輕利，氣力安不？及太夫人波闍波提，并三叔父斛飯王等，問訊起居，亦復如是。」時耶輸陀羅，聞佛遣使，來至王所，未知意趣；卽遣青

衣，令探消息。青衣還白：『世尊遣使，取羅睺羅，度爲沙彌。』耶輸陀羅，聞是消息，將羅睺羅，登上高樓；約敕監官，關閉門閤，悉令堅牢。

時大目連，既到宮門，不能得入，又無人通；卽以神力，飛上高樓，至耶輸陀羅座前而立。耶輸陀羅，見目連來，憂喜交集，迫不得已，卽起禮拜，敕爲敷座，請目連坐。問目連曰：『世尊無恙，教化衆生，不勞神不？遣上人來，欲何所爲？』目連白曰：『太子羅睺，年已九歲，

應令出家，修學聖道。所以者何？母子恩愛，少時如意，一旦命終，墮三惡道，恩愛離別，窈窈冥冥，母不知子，子不知母。羅睺羅得道，當還度母，永度生老，病死憂患，得至涅槃，如佛今也。」耶輸陀羅答曰：「釋迦如來爲太子時，娶我爲妻，奉事太子，如事天神，曾無一失，共爲夫婦，未滿三年，捨五欲樂，騰越宮城，逃至王田，王身往迎，違戾不從，返遣車匿，白馬令還，自要道成，誓願當滅，被鹿皮衣，譬如狂人，隱居山澤，勤苦六年，

得佛還國，都不見親，忽忘恩舊，劇於路人，使我母子，守孤抱窮；今復遣使，欲求我子，爲其眷屬，何酷如之。太子成道，自言慈悲，慈悲之道，應安樂衆生；今反離別人之母子，苦中之甚，莫若恩愛離別之苦；以是推之，今別人母子，何慈之有。」百目連曰：「還向世尊，宣我所陳。」時大目連，更以方便，種種諫喻，曉耶輸陀羅；而耶輸陀羅，絕無聽意。辭退還到淨飯王所，具宣上事。

王聞是已，卽告夫人波闍波提：「我子悉達，遣目連

來，迎取羅睺，欲令入道，修學聖法。耶輸陀難，女人愚癡，未解法要，心堅意固，纏著恩愛，情無縱捨；卿可往彼，重陳諫之，令其心悟。」時太夫人，即便將從五百青衣，至其宮中，隨宜諫喻，反覆再三。耶輸陀羅猶故不聽，白夫人曰：「我在家時，八國諸王，競來見求，父母不許，所以者何？釋迦太子，才藝過人，是故父母，以我配之。太子爾時，知不住世，出家學道；何故慫慂苦求我耶？夫人取婦，正爲恩好，聚集歡樂，萬世相承，子孫相續

，紹繼宗嗣，世之正禮；太子既去，復求羅睺，欲令出家，求絕國嗣，有何義哉？」爾時夫人，聞是語已，默然無言，不知所云。

爾時世尊，卽起化人，空中告言：『耶輸陀羅！汝頗憶念往古世時誓願事不？我當爾時，爲菩薩道，以五百金錢，從汝買得五莖蓮華，上定光佛時；汝求我世所生，共爲夫妻。我不欲受，卽語汝言：『我爲菩薩，累劫行願，一切佈施，不逆人意；汝能爾者，聽爲我妻。』汝立誓

言：『世所生，國城妻子，及與我身，隨君施與，誓無悔心；而今何故愛惜羅睺，不令出家學聖道也。』耶輸陀羅聞是語已，霍然還識宿業因緣，事事明了，如昨所見；愛子之情，自然消歇。遣喚目連，懺悔辭謝，捉羅睺手，付囑目連，與子離別，涕淚交流。爾時羅睺，見母愁苦，長跪合掌，前白母言：『願母莫愁！羅睺今往，定省世尊，尋爾當還，與母相見。』

時淨飯王，爲欲安慰耶輸陀羅，令其喜故；卽集國中

豪族，而告之言：『金輪王子，令當往彼舍婆提國，從佛出家學道；願卿人人，各遣一子，隨從我孫。』咸皆奉命，卽時合集有五十人，隨從羅睺，往到佛所，頭面作禮。佛使阿難，刺羅睺頭，及其五十諸公王子，悉令出家。命舍利弗爲其和尚，大目犍連作阿闍黎，授十戒法，便爲沙彌。

爾時佛子羅睺等，五十沙彌，聞佛說彼扇提羅等罪報因緣，扇提羅等昔爲比丘宿緣罪報文繁不載甚大憂懼，卽各頭面禮白佛言：

「世尊！今聞說此扇提羅等，甚懷怖懼。所以者何？和尙舍利弗，大智福德，國中供養最上甘珍；小兒愚癡，無有福德，食人如是妙好飲食；後世當受苦果，如扇提羅，是故我等實懷憂慮。願佛垂哀，賜聽我屬捨道還家，冀免罪咎。」爾時世尊告羅睺羅：「汝今畏罪還家，求離苦者，是事不然。何以故？譬如二人，乏食饑餓，忽遇主人，爲設種種肥濃美味，其人饑餓，貪食過飽。然此二人：一者有智，一者愚癡。有智之人，自知食過，身體沈重，頻伸

欠呿，卽詣明醫，請除苦患；良醫卽賜摩檀提藥，令其服之，吐宿食已，令近煖火，禁節消息，得免禍患，終保年壽。其無智者，不知食過，謂是鬼魅，殺生祠祭，欲求濟命；腹中宿食，遂成生風，絞切心痛，因是无亡，生地獄中。』佛告羅睺羅：『汝畏罪還家，如彼無智愚癡人也。汝先有善根因緣，遭值我時；如彼明醫，能濟苦患，而得不死。汝今何爲舍明入闇？』羅睺白言：『世尊！諸佛智慧，猶如大海；羅睺等心，猶如毫末，豈能受持如來智慧

· 佛告羅睺：『如天雨滴，後不及前，雖不相及，能滿大器；修學智慧，亦復如是。從小微起，終成大器，如是展轉，滿無量器。是則自利利人，名爲大士，如今我也。』
羅睺羅等，聞佛說已，心開意解。

(三) 受戒得道

出警喻經第十卷

昔者羅睺，未得道時，心性麤獷，言少誠信。佛勅羅睺：『汝往到賢提精舍中住，守口攝意，勤修經戒。』羅睺奉教，作禮而去。

住九十日，慚愧自悔，晝夜不息，佛往視之，羅睺歡喜，前禮佛足，安施繩牀，攝受囊越。佛居繩牀，告羅睺言：『澡盤取水，爲吾洗足！』洗足已訖，佛語羅睺：『此水可食用飲澡漱以不？』羅睺白言：『此水本實清潔；今已洗足，受於塵垢，不可復用。』佛語羅睺：『汝亦如是，雖爲吾子，國王之孫，捨世榮祿，得爲沙門；不念精進，攝心守口，三毒垢穢，充滿胸懷，亦復如此水不可復用也。』佛復語羅睺：『澡盤雖空，可用盛飲食不？』白

言：『不可，所以者何？用有澡盤之名，曾受不淨故也。』

『佛語羅睺：』汝亦如是，雖爲沙門，口無誠信，心性強剛，不務精進，曾受惡名；亦如澡盤，不可盛食也。』

佛以足指，撥却澡盤，應時輪轉自跳自墮，數反乃止

·佛語羅睺：『汝寧惜此澡盤，恐破不乎？』羅睺白佛：

『洗足之器，賤價之物，意中雖惜，不大慙懃。』佛語羅睺：『汝亦如是，雖爲沙門，不攝身口，麤言惡說，多所中傷，衆所不受，智者不惜，身死神去，輪轉三塗，自生

自死，苦惱無量，諸佛賢聖，所不愛惜；亦如汝言不惜燥
槃也。」羅睺聞之，慚愧怖悸。

佛告羅睺：『聽我說喻：昔有國王，有一大象，猛健
能戰。其王興軍，欲伐逆國，被象出兵，以使嚴行；象唯
藏鼻，畏不用鬪，象士歡喜，知象護身。所以者何？象鼻
軟脆，中箭卽死；唯當護口，如此大象，護鼻不鬥。』羅
睺聞佛懇惻之誨，感激自厲，得羅漢道。

佛敎故事叢書
佛大弟子須菩提事蹟

(一) 誕生及出家 出譬喻經第一卷

昔舍衛國，有大長者，名曰鳩留，財富無數，無有子息，遍禱諸神，了不能得；空中天曰：『卿當得禮子，有一天王，垂應命終，生長者家。』長者大喜。却後七日，第一夫人，即覺有娠，月滿生男，名須菩提。色像第一，聰明辯才，博愛多曉，貴賤推敬，其見聞者，有所作爲，

轉以法樂，勸益一切。

諸父兄弟，共嫉恚之，語其母言：『此兒不念治家，遊蕩無度。』母言：『此兒福德，不與凡同。』後須菩提索食，母令婢預洗空器，答其無有；須菩提發器視之，自然百味，飯食香美，一切共食，皆得安隱；諸父兄弟，方知非凡，請佛及菩薩大眾設食，食畢，兒從父母：求作沙門。父即聽之，隨佛還祇洹，即作沙門，應時得阿惟顏。在弟子中，現作羅漢。

(二)宿世因緣 出福報經

時須菩提，卽隨如來，還至祇洹，便作沙門；應時得阿惟顏，神通具足，隨俗教化，在弟子中，現作羅漢。阿難白佛言：『此須菩提，本修何功德？』佛言：『此人無數世時，作貧家子，逢一比丘，入城分衛，遍無所得。爾時年少，見其鉢空，作禮白言：『願隨我歸！當相供養。』卽隨到家，取已食分，供養道人，而自不食。道人食竟，現飛而去，年少歡喜，卽發道意。緣是功德，後生天上

九十一劫・今復來生長者家・爾時年少者，今須菩提也。
一施之福，尚乃如此，況復多乎。』

羅 睺 羅 須 菩 提

佛 教 故 事 叢 書

中 華 民 國 二 十 一 年 一 月 初 版

◎ 每 冊 定 價 大 洋 三 分

編 述 者 佛 學 書 局 編 輯 部

出 版 者 佛 學 書 局

印 刷 者 國 光 印 書 局

上 海 新 大 沽 路 丁 四 十 號

總 發 行 所 上 海 佛 學 書 局

開 北 新 民 路 國 慶 路 口

分 發 行 所 上 海 佛 學 書 局

北 火 車 站 東 首 寶 山 路 口

2

253378

(147)

